



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-221/02

Sarajevo, 15.marta 2002.

Z A P I S N I K

sa 22. sjednice Predstavničkog doma Parlamentarne skupštine Bosne i Hercegovine,
održane 15. marta 2002. godine

Sjednica je počela s radom u 13,45 sati. Prisustvovalo je 40 poslanika. Odsustvo su opravdali Zoran Spasojević i Salih Kulenović.

Kao gosti sjednici su prisustvovali predsjedavajući Predsjedništva BiH Beriz Belkić, članovi Predsjedništva Živko Radišić i Jozo Križanović, predsjedavajući Vijeća ministara Zlatko Lagumdžija, kao i svi ministri i zamjenici ministara.

Sjednici su prisustvovali predstavnici međunarodnih organizacija OHR-a, OSCE-a, EU, te jednog broja ambasada u Bosni i Hercegovini.

Predsjedavajući Željko Mirjanić predložio je samo jednu tačku dnevnog reda – Odobravanje imenovanja predsjedavajućeg Vijeća ministara i ministara i zamjenika ministara.

Prvi zamjenik predsjedavajućeg Doma **Mariofil Ljubić** predložio je da se u dnevni red uvrsti rasprava o implementaciji Odluke Ustavnog suda BiH o konstitutivnosti naroda na cijeloj teritoriji Bosne i Hercegovine. Obrazložio je svoj prijedlog i rekao, ako neko smatra da ovo ne bi trebalo razmatrati na današnjoj sjednici, da on nema ništa protiv da se održi posebna sjednica Doma tematski posvećena ovom pitanju.

Drugi zamjenik predsjedavajućeg Doma Sead Avdić obavijestio je Dom da je Klub poslanika SDP-a neposredno pred ovu sjednicu raspravljao o pitanju usaglašavanja entitetskih ustava sa Odlukom Ustavnog suda i da smatra da Parlament BiH ne može ostati izuzet iz ovog procesa. Predložio je da se u narednih 15 dana sazove tematska sjednica oba doma kako bi razmatrali temeljne postavke i principe implementacije Odluke Ustavnog suda.

Predsjedavajući Kluba poslanika SDA **Adem Borić** podržao je prijedlog Mariofila Ljubića.

Predsjedavajući Kluba PDP-SNSD/DSP-SNS-SPRS Željko Bilbija predložio je da se pitanje koje je Mariofil Ljubić predložio ostavi za narednu sjednicu kako bi poslanici imali vremena da se pripreme za kvalitetnu raspravu.

Miro Grabovac rekao je da Klub HDZ-a podržava prijedlog Mariofila Ljubića i smatra da svakako na ovoj sjednici treba uvrstiti raspravu o ovoj važnoj materiji koja se

tiče uspostave konstitutivnosti i suverenosti sva tri naroda na cijelom prostoru Bosne i Hercegovine.

Mirko Mijatović je izrazio iznenađenje što prijedlog za dopunu dnevnog reda dolazi od dvojice članova Kolegija, te zapitao – ko im je kao rukovodiocima branio da ovo pitanje puste u normalnu parlamentarnu proceduru. Ovako se nudi da se iz džepa izvuče rezolucija o kojoj bi danas trebalo raspravljati. Ishitrenost kojom se postavlja tako značajno pitanje na tako neozbiljan način ne ukazuje na dobronamjernost, rekao je, između ostalog, Mirko Mijatović i naglasio da on nema ništa protiv da Parlament BiH, kao najviše zakonodavno tijelo, vodi diskusiju u nekoj ozbiljnoj formi.

Predsjedavajući Kluba Stranke za Bosnu i Hercegovinu **Mustafa Cuplov** rekao je da Klub Stranke za BiH podržava raspravu o tako značajnom pitanju, ali se ne može oteti dojmu da je prijedlog došao sa dosta zakašnjenja. Tužna je činjenica da se uopšte treba raspravljati o Odluci Ustavnog suda BiH koja je obavezujuća. Nažalost, to je istina Bosne i Hercegovine, rekao je, između ostalog, Mustafa Cuplov i izrazio mišljenje da i Parlament BiH mora u svemu tome značajno participirati.

Mirko Banjac je rekao da je Kolegij ranije poslanike i sebe pripremio da ova sjednica protekne u jednoj atmosferi u kojoj će se riješiti veoma važno pitanje – izbor Vijeća ministara, a onda se predomislio i izašao sa ovim prijedlogom. Naglasio je da to nije dobra poruka i da ne vidi nijedan razlog koji bi se mogao nazvati dobronamjernim, već da su prijedlozi za proširivanje dnevnog reda želja za komplikovanjem situacije. Podsjetio je da se o spomenutom pitanju vode razgovori između 7-8 političkih partija i da se rezultati ne znaju, te da bi poslanici mogli razgovarati kada bi imali nešto kao već utvrđeni prijedlog. Predložio je Kolegiju da sjednicu vodi po predloženom dnevnom redu.

Boro Bjelobrk se složio da Dom treba da raspravlja o implementaciji Odluke Ustavnog suda, ali je predložio da ova sjednica radi po predloženom dnevnom redu, a da se u što kraćem roku pripremi ozbiljna rasprava na temu provedbe Odluke Ustavnog suda i mogućeg doprinosa ovog parlamenta dovođenju toga postupka do kraja.

Bogić Bogićević podržao je inicijativu Mariofila Ljubića i ocijenio je veoma važnom. Međutim, skrenuo je pažnju da se radi o primjeni ustava entiteta, a ne Ustava Bosne i Hercegovine, što ne znači da Parlament BiH ne treba da vodi raspravu o ovom veoma važnom pitanju za budućnost BiH. Predložio je da se jedna ovako ozbiljna tema pripremi za prvu narednu sjednicu i, između ostalog, naglasio da je programsko određenje SDP-a bilo, jeste i bit će da svi narodi, svi pripadnici kolektiviteta budu jednakopravni i konstitutivni na svakom dijelu Bosne i Hercegovine.

Predsjedavajući Doma **Željko Mirjanić** odgovorio je na neka pitanja postavljena u diskusiji. Između ostalog rekao je da se o pomenutoj rezoluciji nije govorilo na sjednici Kolegija i da je za to i sam saznao na početku sjednice kao i poslanici. Rekao je da nije bilo problema oko dnevnog reda i da je dnevni red prihvatio Prošireni kolegij Predstavničkog doma. Podsjetio je da implementacija Odluke Ustavnog suda nije u nadležnosti Parlamenta BiH već skupština entiteta, ali da Predstavnički dom može zauzeti politički stav. Naglasio je da nema teksta rezolucije i da se iz tehničkih razloga ne može uvrstiti u dnevni red, te da je predlagač bio dužan da dostavi tekst rezolucije barem na početku sjednice da bi je poslanici pročitali. Dalje je Mirjanić, između ostalog, rekao da se ne može o tako važnom pitanju raspravljati ad-hoc, da poslanici nisu konsultovali svoje građane, birače, niti stranke. Naglasio je da lideri političkih stranaka razgovore o ovom pitanju vode pod pokroviteljstvom Visokog predstavnika i da poslanici nisu obaviješteni o

rezultatima tih razgovora, što su sve razlozi da danas nema uslova za raspravu o predloženom pitanju.

Ivo Lozančić je podržao prijedlog za dopunu dnevnog reda i, između ostalog, rekao da nema bitnijeg pitanja od pitanja konstitutivnosti naroda u BiH.

Dalje su povodom prijedloga za dopunu dnevnog reda diskutovali Zlatko Lagumdžija, Mariofil Ljubić, Miro Grabovac, Marko Amidžić, Ibrahim Đedović, Sead Buturović, Dušan Stokić, Abdurahman Malkić, Mirko Banjac i Damir Mašić.

Poslije diskusije predsjedavajući je dao pauzu, a nakon pauze drugi zamjenik predsjedavajućeg Sead Avdić obavijestio je poslanike da je Kolegij usaglasio prijedlog da se sjednica sazove za 22. mart 2002. na temu – Rasprava o implementaciji Odluke Ustavnog suda BiH o jednakopravnosti i konsitutivnosti naroda u Bosni i Hercegovini.

U vezi s zahtjevom koji je u diskusiji iznio poslanik Abdurahman Malkić, da se preispita povjerenje predsjedavajućem Predstavničkog doma Željku Mirjaniću, Sead Avdić je obavijestio Dom da je Kolegij zauzeo stav da je neophodno podnijeti pismeni zahtjev s obrazloženjem koji se uvrstio u dnevni red naredne sjednice Predstavničkog doma.

Miro Grabovac je obavijestio Dom da je Klub poslanika HDZ-a održao sjednicu u pauzi i zaključio da zahtijevaju glasanje o prijedlogu da se u dnevni red ove sjednice uvrsti tačka koju je predložio Mariofil Ljubić. Rekao je da im je bitno da se to uvrsti u dnevni red ove sjednice, a sjednica može da se prekine i nastavi za 10 dana. Tražio je da se Dom prvo izjasni o prijedlogu Kluba HDZ-a.

Predsjedavajući Mirjanić dao je na glasanje prvo prijedlog kluba HDZ-a za dopunu dnevnog reda tačkom – Rasprava o implementaciji Odluke Ustavnog suda BiH o jednakopravnosti i konstitutivnosti naroda u Bosni i Hercegovini.

Od 38 prisutnih ZA je glasalo 11, protiv 22, suzdržala se tri poslanika. Prema tome, prijedlog nije usvojen.

Potom se Dom izjasnio o prijedlogu Kolegija, da se za 22. mart 2002.godine sazove sjednica Doma na navedenu temu.

Od 38 prisutnih, ZA prijedlog je glasalo 27 glasova, a 8 je glasalo protiv. Glasajući po entitetima iz Federacije BiH ZA su glasala 24 poslanika, a iz Republike Srpske četiri.

Predsjedavajući je konstatovao da prijedlog nije dobio entitetsku većinu i da ide na usaglašavanje u Komisiji Kolegija.

Potom je za 22. sjednicu jednoglasno usvojen sljedeći

D N E V N I R E D:

1. Odobravanje imenovanja:
 - a) predsjedavajućeg Vijeća ministara,
 - b) ministra i zamjenika ministara Vijeća ministara.

Ad. – 1.a) Odobravanje imenovanja predsjedavajućeg Vijeća ministara

Predsjedavajući Mirjanić pročitao je Odluku Predsjedništva Bosne i Hercegovine o imenovanju predsjedavajućeg Vijeća ministara, a potom podsjetio poslanike na

odredbe Poslovnika Doma koje propisuju postupak odobravanja imenovanja. Zatim je pozvao novoimenovanog predsjedavajućeg Vijeća ministara, dr. Dragana Mikerevića, da Domu podnese svoj politički program.

Dr. Dragan Mikerević prvo se zahvalio Domu na podršci koju je davao Vijeću ministara u dosadašnjem periodu ovog mandata. Potom je u svom izlaganju, između ostalog, rekao da ovo vijeće ministara djeluje u vrijeme kada su demokratske promjene u našoj zemlji postale vidljive, otpori prema njima manji, a riječ javnosti oštija, te da nema sumnje da će kriterijumi koji će biti postavljeni i traženi u narednih osam mjeseci biti veoma visoki. Istakao je da je dosadašnji rad Vijeća ministara bio sinhronizovan i da nema sumnje da će on nastojati takav rad obezbijediti i u narednom periodu. Zatim je iznio neke pokazatelje u vezi s privrednim kretanjima u BiH, a onda i zadatke Vijeća ministara: da zaštiti BH tržište od nelojalne konkurencije; da obezbijedi političku stabilnost, funkcionisanje i efikasnost pravnog sistema; da sprovede akcioni plan borbe protiv korupcije; da obezbijedi pojednostavljenje procedure za registraciju firmi; da sprovede reformu carinskih, poreskih i inspeksijskih službi, odnosno kontrolnih organa na svim nivoima vlasti, kao i reformu radnog zakonodavstva; povećanje procenta iskorištenosti domaćih proizvodnih resursa i otklanjanje limitirajućih faktora rasta domaće proizvodnje i izvoza itd.

Govoreći o preporuci Parlamentarne skupštine Vijeća Evrope Komitetu ministara da primi Bosnu i Hercegovinu u Vijeće Evrope, g-din Mikerević je rekao da ona znači da je dugogodišnji trud BiH u reformama vladavine prava, demokratizacije društva i ekonomskim reformama prepoznat kao vrijedno dostignuće i ispravan put koji Bosnu i Hercegovinu sigurno i nezaustavljivo vodi ka evropskim integracijama. Kako prijem u Vijeće Evrope predstavlja tek prvu etapu tog puta, pred institucijama BiH i njenih entiteta nalazi se veliki dio posla sadržanog u spisku uslova koje treba ispuniti u postprijemnom periodu, uz podršku i monitoring Vijeća Evrope. Ispunjenje 91 uslova zahtijevat će puni angažman Parlamentarne skupštine, Predsjedništva i Vijeća ministara Bosne i Hercegovine i entitetskih vlada, rekao je, između ostalog, Dragan Mikerević.

Osvrćući se na događaje u Sjedinjenim Američkim Državama u septembru 2001. godine, g-din Mikerević je rekao da su na međunarodnom planu novi prioriteti u radu Vijeća ministara i drugih institucija BiH i vlasti entiteta, naglasivši čvrstu opredijeljenost da BiH bude još aktivnija u svjetskoj alijansi borbe protiv terorizma, te da će Vijeće u narednom periodu insistirati na daljoj operacionalizaciji projekta CIPS-a na izradi bezbjednosne politike BiH, te preuzimanju preostalog dijela granice BiH od strane Državne granične službe, što će borbu protiv terorizma učiniti efikasnijom, rekao je Dragan Mikerević.

Dalje je istakao da je ostalo još puno zadataka. Ispunjeno je 9 od 18 smjernica Mape put Evropske unije. Ovo vijeće ministara ima kredibilitet da princip partnerstva sa međunarodnom zajednicom razvija kao strateško opredjeljenje Bosne i Hercegovine, te da će insistirati da sami sve više preuzimamo odgovornost za vlastiti razvoj.

Vijeće ministara će dati prioritet ispunjenju kreditnih obaveza BiH, prijemu BiH u Svjetsku trgovinsku organizaciju, pristupanju BiH Programu partnerstva za mir, potpunoj realizaciji Aneksa VII Opšteg okvirnog sporazuma za mir u BiH, rekao je između ostalog, Dragan Mikerević u svom ekspozeu. Zaključio je da se radi o kontinuiranim aktivnostima Vijeća ministara i da svoj rad u narednih osam mjeseci vidi kao nastavak rada Vijeća ministara pod vodstvom njegovih prethodnika dr. Matića i dr. Lagumdžije. Naglasio je da

cilj Vijeća ministara prevashodno mora biti prosperitet građana, put do demokratskog društva i visokog društvenog standarda, jačanje institucija sistema i podizanje opšteg povjerenja u sistem i vladavinu zakona. Najviši cilj je da se osigura našim građanima da prevaziđu traume proteklog rata, da konsoliduju svoje snage i vrate se normalnom životu i privređivanju, rako je, pored ostalog, dr. Dragan Mikerević izlažući svoj politički program. Svoje izlaganje zaključio je uvjeravanjem da će Vijeće ministara u punoj mjeri poštovati unutrašnju strukturu Bosne i Hercegovine koja je definisana Ustavom Bosne i Hercegovine, odnosno Aneksom IV Dejtonskog mirovnog sporazuma.

U diskusiji u okviru tačke 1-a) učestvovali su:

Adem Borić – između ostalog, rekao je da smo čuli jednu priču koju smo čuli i od gospode Matića i Lagumdžije. I ranija priča je bila je da će biti vladavina zakona u BiH, a ovaj parlament i ovo ministarsko vijeće nisu uspjeli da donesu državne zakone na nivou Bosne i Hercegovine. Ne možemo govoriti o vladavini prava ako na nivou BiH ne postoji sudstvo. Ako ne postoji sudstvo ne mogu se poštovati ni ljudska prava. Rečeno je da će biti direktnih investicija, a nije ih bilo pa nema ni zapošljavanja. Rečeno je da će se smanjivati odlazak ljudi vani, a nije smanjen – i dalje odlaze, rekao je, između ostalog Adem Borić i naglasio da je u programu predsjedavajućeg Vijeća ministara zaboravljen mali čovjek, bosanski čovjek, te obavijestio Dom da će Klug poslanika SDA, nakon svega što je urađeno i što su na prethodnoj sjednici čuli iz Izvještaja o radu Vijeća ministara, glasati protiv.

Damir Mašić – između ostalog, iznio je svoje zadovoljstvo što je kandidat za predsjedavajućeg Vijeća ministara u izlaganju kao bitan faktor ekonomske stabilnosti BiH naveo povećanje i podsticaj domaće proizvodnje. Ispred Kluba poslanika SDP-a zatražio je od Vijeća ministara da pripremi materijal, i da se sazove tematska sjednica oba doma na temu – Podsticaj domaće proizvodnje s ciljem povećanja izvozno konkurentne sposobnosti privrede Bosne i Hercegovine.

Franjo Majdandžić – na početku diskusije rekao je da Klub poslanika Stranke za BiH podržava kandidata, cijeni i uvažava program kao sveobuhvatan, sadržajan i perspektivan. Potom je u svoje ime dao nekoliko prijedloga za koje je rekao da bi ušli u neku eksplicitnost u daljem radu, a to su: da bude jedan model privataizacije na nivou države, da se učine radikalniji zahvati na racionalizaciji i efikasnosti države, da se poslanicima prezentiraju obaveze koje se moraju ispuniti kako bi se pripremili za ekspeditivniji rad, da se pokrene reforma sveukupnog obrazovnog sistema, kao i reforma penzionog sistema, da se izradi strategija daljeg razvoja privrede kako bi BH proizvod bio prepoznatljiv u svijetu.

Omer Filipović – podržao je izlaganje Dragana Mikerevića i njegove programske aktivnosti. Posebno je podržao nastavak donošenja odluka i zakonskih projekata konsenzusom, što je bitno za dalju proceduru i efikasniji rad u Predstavničkom domu. Također je podržao jačanje institucija BiH u okviru važećeg Ustava, jer Ustav mnogo toga ne sprečava, a upućuje na dogovore, rekao je, između ostalog, Omer Filipović.

Sead Buturović – podsjetio je na svoju diskusiju o Izvještaju o radu Vijeća ministara, kojom prilikom se založio da Vijeće ministara preraste u vladu države BiH koja će zaista vladati cijelim prostorom države. U tom kontekstu dao je podršku promjeni Zakona o Vijeću ministara, gdje će Vijeće ministara prerasti u vladu koja će biti manje politična, više stručna, opredijeljena na ekonomske reforme, u koju će se uključiti sve

probosanski orijentisane snage. Iznio je zamjerku što u sastavu Vijeća ministara nema niko iz opozicije, iako je i pozicija uvjerena da u opoziciji ima izuzetno stručnih i kvalitetnih ljudi. Što se tiče ponuđenog programa, posebno ekonomskog, Buturović je rekao da nije zadovoljan dosadašnjom privatizacijom kroz oblike upisa dionica ili putem javnog tendera. Zatražio je da se što prije donese zakon o koncesijama na nivou države, koji će privući strane i domaće investicije, a što je uslov ekonomskog oporavka ove države. Izrazio je nezadovoljstvo učinjenim u oblasti ljudskih prava, te pozvao Vijeće ministara, a posebno Ministarstvo za ljudska prava, da se pozove na Univerzalnu deklaraciju Ujedinjenih nacija i Evropsku konvenciju o ljudskim pravima, gdje je država isključivi garant i nosilac ljudskih prava, rekao je, između ostalog, poslanik Sead Buturović.

Mirko Banjac – rekao je da je očekivao da će se neko ispred Predsjedništva BiH obratiti Domu i reći nešto više od onoga šturog dopisa u kome stoji da je g-din Mikerević imenovan. Očekivao je da će Predsjedništvo kazati da je u prijedlogu rukovođeno dosadašnjim radom i rezultatima rada g-dina Mikerevića na mjestu ministra. Dalje je spomenuo prodaju zlata za 11 miliona, o čemu je Vijeće ministara odlučilo konsenzusom, pa je rekao da je u ovom parlamentu bilo puno nejasnoća i puno dizanja ruku bez argumenata i objašnjenja. Potom je Banjac analizirao pojedine dijelove ekspozea, naglasivši da iza konstatacija o uspješnom radu u pojedinim segmentima ne stoje rezultati. Zatim je zatražio da Mikerević objasni svoju izjavu na nekoj radio-stanici, da neće razgovarati sa nacionalnim strankama i da objasni kakvo je njegovo poimanje u odnosu na taj stav i kakvo je njegovo poimanje demokratije uopšte na ovim prostorima. Dalje je zatražio, s obzirom da je unaprijed data i lista kandidata za ministre, da g-din Krešimir Zubak kaže da li i dalje ostaje pri svojoj namjeri kršenja i rušenja ustavno-pravnog uređenja Bosne i Hercegovine, a želi da bude ministar – da znamo za šta glasamo, da li je to istovremeno i glasanje za rušenje ustavno-pravnog uređenja države. Rekao je da on ne osuđuje to što neko predlaže – neka u redovnoj proceduri dobije potvrdu, ili negaciju svog prijedloga, ali mu je neshvatljivo i nepojmljivo da neko želi da upravlja jednom državom kao visoki funkcioner a da istovremeno paralelno s tim ruši ustavno-pravni poredak države, rekao je, pored ostalog, Mirko Banjac.

Mariofil Ljubić je u svojoj diskusiji rekao da i ovo vijeće ministara ima pravicu svoga djelovanja, ima mjere ekonomske politike koje su na početku za vrijeme Matića bile predložene, te da očekuje da će novo Vijeće kad bude izabrano ići sa svojim programom. Naglasio je da je očekivao da će se u izlaganju osvrnuti na neka pitanja na koja bi trebalo staviti akcenat. Zna se da je velika nezaposlenost i teško će se finim pričama o nekim velikim promjenama i o privrednoj reformi postići veći efekti, već da bi uporedo s pripremom za privredni prosperitet trebalo praviti programe za podsticaj samozapošljavanja, posebno u poljoprivredi i stočarstvu. Zato u narednom periodu očekuje više takvih projekata gdje će se kroz kreditne aranžmane podsticati ljudi za povratak u opustjela mjesta i samozapošljavanje, rekao je, između ostalog, Mariofil Ljubić. Dalje je rekao da je očekivao da će se bar u naznakama dati razmišljanje o uvođenju jedinstvene stope poreza na dodatnu vrijednost, za nastavak reforme carinskih službi i poboljšanje njihove efikasnosti. Na kraju je rekao da se s nekim dijelovima izlaganja i slaže i da će nastojati da u narednih osam mjeseci i Parlament da doprinos da imamo više zakona, te pozvao Vijeće ministara da malo brže ide sa zakonodavnom reformom.

Kandidat za predsjedavajućeg Vijeća ministara Dragan Mikerević, odgovarajući na kritike i sugestije u diskusiji, rekao je da je pažljivo slušao i kritike i sugestije, te da će mu svakako biti korisne, jer su mu pobudile novo promišljanje o nekim problemima, iako su mnogi od njih već u opticaju. Rekao je, između ostalog, da nije smatrao obaveznim da iznosi program, jer je već rekao da je ovo vijeće ministara koje je u kontinuitetu. Na primjedbju Mirka Banjca da je u izlaganju naveo da je bilo političkih turbulencija – rekao je da je ovo vijeće vlast preuzelo u doba kada je zaista toga bilo i kada su u tom periodu na svim nivoima započeli istinske ekonomske reforme. Na pitanje postavljeno Predsjedništvu vezano za njegove rezultate rada, rekao je da je Parlamentu podnio izvještaj koji je Parlament i usvojio. U svakom slučaju, puno će se raditi na tješnjoj saradnji između Parlamenta i Vijeća ministara, za što se inicijative nalaze i u nekim poslaničkim klubovima, jer se ulazi u jednu fazu gdje će biti pune ruke posla, rekao je, između ostalog, Dragan Mikerević u ponovnom obraćanju Domu poslije diskusije povodom njegovog ekspozea.

Krešimir Zubak se javio za riječ povodom pitanja koje je na njegovu adresu uputio Mirko Banjac u diskusiji. Između ostalog, rekao je da smatra da Mirko Banjac, kao istinski demokrata, uvažava jedno od temeljnih načela, a to je pravo na vlastito mišljenje, te da on kao pojedinac ili kao političar, pa i kao ministar, ima pravo na vlastito mišljenje, pa i o tome kako je uređena Bosna i Hercegovina. Šta više, misli da u ovoj funkciji u kojoj jeste treba da ukaže na probleme u organizovanju i strukturi vlasti ove države koji onemogućavaju i otežavaju da se izađe iz ovog stanja, pa bi trebalo biti dužnost svih koji su u strukturama vlasti da, kad uoče da su za promjene prepreka ustavna i zakonska rješenja, da iniciraju postupak da se te prepreke otklone, rekao je Krešimir Zubak i naglasio da lično misli da se treba zalagati da sve što se želi mijenjati, da se to mijenja kroz institucije sistema.

Pošto više nije bilo prijavljenih za diskusiju, predsjedavajući Doma dr Željko Mirjanić dao je na glasanje odobravanje imenovanja predsjedavajućeg Vijeća ministara.

Od 38 prisutnih ZA je glasalo 25, protiv 7, suzdržalo se 6 poslanika. Po entitetima, iz Federacije BiH ZA je glasalo 16, iz Republike Srpske 8 poslanika.

Predsjedavajući Mirjanić je konstatovao da je Predstavnički dom odobrio imenovanje dr Dragana Mikerevića za predsjedavajućeg Vijeća ministara Bosne i Hercegovine.

Po odobrenju imenovanja za riječ se javio član Predsjedništva g-din Jozo Križanović. U vezi s pitanjima koja su u diskusiji postavljena rekao je, pored ostalog, da je Predsjedništvo BiH, u skladu sa Ustavom BiH, Poslovnikom Predstavničkog doma i Zakonom o Vijeću ministara i ministarstvima Bosne i Hercegovine, pravovremeno započelo konsultacije za imenovanje novog predsjedavajućeg. Naravno, prije toga Predsjedništvo je analiziralo i Izvještaj o radu Vijeća ministara. U okviru konsultacija izvršen je razgovor sa odlazećim predsjedavajućim Vijeća ministara, sa kolegijima oba doma Parlamentarne skupštine, te sa predstavnicima svih političkih stranaka koje učestvuju u ovom domu, osim BPS i HDZ-a. Na osnovu tih konsultacija Predsjedništvo se opredijelilo da za predsjedavajućeg imenuje g-dina Dragana Mikerevića, rekao je Jozo Križanović i zahvalio se Domu što je podržao Odluku Predsjedništva.

Predsjedavajući Doma Željko Mirjanić u ime Predstavničkog doma i u svoje čestitao je dr Mikereviću na izboru i zaželio mu uspješan rad.

Ad. – 1.b) Odobravanje imenovanja ministara i zamjenika ministara Vijeća ministara

Predsjedavajući Mirjanić pozvao je predsjedavajućeg Vijeća ministara da iznese prijedlog za sastav Vijeća ministara.

Predsjedavajući Vijeća ministara Dragan Mikerević predložio je dosadašnje ministre i zamjenike ministara za sastav Vijeća ministara.

O prijedlogu nije bilo diskusije.

Sa 24 glasa ZA (prilikom glasanja prisutno 37 poslanika), 7 protiv i 6 suzdržanih – iz Republike Srpske ZA je glasalo 8, iz Federacije BiH 15, Predstavnički dom je odobrio imenovanje ministara i zamjenika ministara, kako slijedi:

- dr Zlatko Lagumdžija – za ministra vanjskih poslova,
- Ivica Mišić i Milova Blagojević – za zamjenike ministra vanjskih poslova;

- dr Dragan Mikerević – za ministra evropskih integracija,
- Rasim Kadić i Zoran Marijanović – za zamjenike ministra evropskih integracija;

- dr Ante Domazet – za ministra za trezor institucija Bosne i Hercegovine,
- Muharem Imamović i Gordana Ković – za zamjenike ministra za trezor institucija Bosne i Hercegovine;

- Svetozar Mihajlović – za ministra civilnih poslova i komunikacija,
- Jusuf Halilagić i Milan Lovrić – za zamjenike ministra civilnih poslova i komunikacija;

- Krešimir Zubak – za ministra za ljudska prava i izbjeglice,
- Kadrija Haračić-Šabić i Vladislav Vladičić – za zamjenike ministra za ljudska prava i izbjeglice;

- dr Azra Hadžiahmetović – za ministra vanjske trgovine i ekonomskih odnosa,
- Jadranko Prlić i Nikola Kragulj – za zamjenike ministra vanjske trgovine i ekonomskih odnosa.

Predsjedavajući Mirjanić čestitao je ministrima i zamjenicima na ponovnom imenovanju i zaželio im uspješan rad u narednom periodu.

Ovim je, u 17,45 sati, završena 22. sjednica.

Sastavni dio ovog zapisnika je transkript 22. sjednice Predstavničkog doma.

S E K R E T A R
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Željko Mirjanić